


Kanak-kanak didedahkan pertanian mesra alam



UNIT Organik, Fakulti Pertanian, Universiti Putra Malaysia (UPM) baru-baru ini menganjurkan Program Pendidikan Organik Untuk Makanan Sihat bagi memberi pendedahan awal kepada golongan kanak-kanak terhadap kepentingan aktiviti pertanian mesra alam.

Ketua program, **Dr. Martini Mohammad Yusoff** berkata, kanak-kanak diberi pendedahan untuk menyediakan bahan tanaman secara organik termasuk kompos, tuaian serta pengendalian hasil tanaman untuk pemakanan

sihat.

Katanya, penanaman organik termasuk kaedah penjagaan kawasan penanaman organik yang seratus peratus tidak menggunakan baja dan racun kimia untuk pengawalan serangga perosak.

Pelopor Unit Organik, Fakulti Pertanian, UPM, **Prof. Madya Dr. Siti Hajar Ahmad** berkata kepentingan pengambilan makanan yang dihasilkan secara organik semakin mendapat tempat dalam kalangan masyarakat.

“Masyarakat dapat melihat pengambilan makanan yang

ditanam secara organik adalah lebih baik untuk kesihatan dan kualitinya juga terjamin,” katanya.

Beliau berkata, aktiviti yang diadakan bukan sahaja untuk mendedahkan kanak-kanak kepada kepentingan pemakanan sihat tetapi juga terhadap cara penanaman yang mudah di samping berseronok menikmati alam yang menghijau tanpa pencemaran.

Pelajar dari China Yantzen University, **Chen Mengyuan**, 19, berkata, ini adalah pengalaman pertamanya mengikuti program seumpama

itu yang memberi ilmu baharu kepada dirinya.

“Aktiviti ini tiada di negara saya dan saya berharap akan dapat mendidik kanak-kanak di negara saya untuk mempelajari penanaman organik untuk dimanfaatkan bersama,” katanya.

Program satu hari itu yang kali kedua dianjurkan, mendapat sambutan dalam kalangan ibu bapa peserta.

Ia bermula dengan aktiviti penyediaan tanah, penanaman sayur dan lawatan ke tapak penyediaan kompos.